

## Ovras electricas en Svizra: Duai il stadi las sustegnair?

■ (anr/gc) Dapi tschintg onns è il pretsch per il current electric sa sbassà en Svizra per la mesadad. Quai è succedì principalmain en consequenza da l'import dad energia bunmartgada da vent e sulegl, e ferm subvenziunada, ord la Germania. Quai ha gè grevas consequenzas per las societads dals implonts idraulics svizzers. Perquei han pliras ovras electricas era sistè da bajegiar or u engrondir lur lais ed indrizs da producziun – sco stà projectà. La rentabilitad na pussibiliteschia betg talas investiziuns.

Era la cumissiun per ambient, planisaziun ed energia dal cussegl naziunal è sa fatschentada cun questa situaziun, l'ha analisà e fatg sias ponderaziuns. Ella sa dumonda dentant schebain il stadi na pudessia betg gidar ils implants idraulics cun subvenziuns u emprests, uschia che quels fissan cumpetitivs.

Per il Grischun è quai che la numnada cumissiun ha gè endament – segund cuss. gov. *Mario Cavigelli*, president da la regenza – ina buna nova. Mo i dettia en quest regard differentas opticas denter ils chantuns da muntogna e la confederaziun. La situaziun finanziaria tar las grondas ovras electricas svizras saja dentant detg volatila, siond ch'i dettia interpresas cun in considerabel agen chapital. Ed i saja da sa dumandar schebain quest agid giess be ad implants renovabels u era per als engrondir, u schizunt ad ovras idraulicas novas. Anc na saja nagut decidì davart l'agid finanziel pir prendì en vista.